



## **Protocol**

Dalla 18. radunonza generala dil Provediment d'aua Medel/Lucmagn, gievgia ils 26 da mars 2026 allas 20.00 uras ell'aula dalla scoletta a Curaglia

### **Tractandas :**

1. Beinvegni
2. Elecziun d'in dumbravuschs
3. Approbaziun dil protocol dils 20-03-2025
4. Presentaziun ed approbaziun dil quen 2025
5. Rapport dil president
6. Program da lavur 2026
7. Fixar las taxas d'aua per 2026
8. Elecziuns / reelecziuns
  - a) president
  - b) cassier
  - c) revisur da quen
9. Nominaziun da candidats per las elecziuns communalas
10. Varia

**Perstgisas:** Hanspeter Bundi, Manuel Giger

## **1. Beinvegni**

Il president Alfons Venzin fa a tuts presents in cordial beinvegni tier la 18avla radunonza generala dil Provediment d'aua Medel/Lucmagn.

El menziunescha che l'invitaziun e la gliesta da tractandas seigi vegnida publicada conform als statuts dil Provediment d'aua.

Sin la damonda per midadas ni amplificaziuns dalla gliesta da tractandas vul negin fa menziun.

Aschia declara il president la radunonza sco aviarta.

## **2. Elecziun d'in dumbravuschs**

Sco dumbravuschs vegn Giusi Flepp proponius ed era elegius.

La radunonza dumbra ensemen cun la suprastonza 12 vuschs.

## **3. Approbaziun dil protocol dils 20-03-2025**

Il protocol dalla 17avla radunonza generala dils 20-03-2025 ei publicaus sin nossa pagina d'internet. Sin la damonda sch'ei vegn giavischau da leger avon il protocol negin che s'annunzia.

Il president fa la damonda sch'ei dat aunc damondas ni giavischs per midadas vid il davos protocol. Sinquei che negin dils presents giavischa il plaid fa il president la tscharna d'approbar il protocol aschia sco el ei publicaus. Quel vegn approbaus unanimamein dils presents.

Il president engrazia agl actuar per l'ediziun.

## **4. Presentaziun ed approbaziun dil quen 2025**

Per la presentaziun dil quen 2025 dat il president il plaid al cassier Cedric Flepp.

Il cassier declara il quen il qual el ha repertiu als presents en fuorma da carnet.

La billanza muossa la summa total activas respectiv passivas da 1'155'914.- frs.

Il capital agen secloma 244'890.- frs.

La sperdita net. da 8'108.- frs seresulta ord total entradas da 126'660.- frs ed extradadas da 134'769.- frs. Quei suenter haver fatg amortisaziuns da 97'780.- frs.

Plinavon cuntegn il quen ina tabella dils projec actuals cun las amortisaziuns.

Niev cuntegn il quen annual era ina « Mittelflussrechnung»

Sin la damonda per ulteriuras informaziuns dil quen annual ha negin giavischau il plaid. Aschia dat il president il plaid al revisur Martin Bearth.

Lez pren il plaid ed engrazia sco emprem al cassier Cedric per sia buna lavur sco cassier dil Provediment d'aua. Il quen ei menaus endretg e proffesional, tuts mussaments ein avon maun. Ils revisurs fan la proposta da dar scarica al cassier ed approbar il quen 2025 sco el ei gest vegnius presentaus dil cassier.

Sinquei fa il president la damonda dad approbar il quen 2025. Il quen vegn approbaus unanimamein dils presents.

Werner Giger giavischa il plaid e fa la damonda co ei stat culs cuosts dil niev aquaduct da Fuorns/Acla. Sche quei quen corrispunda sco bugetau ?

Il president rispunda a quella damonda e declara che quei project ei vegnius bugetaus cun 4'300'000.- frs. La summa dallas offertas eran lura sut 4'000'000.- frs. Tut las lavurs ein aunc buca terminadas ed era aunc buca pagau tut ils quens. Vegniu vitier ei la sanaziun dalla via dad Acla viers Davos Pali. Ina calculaziun momentana havein buca. Tochen il proxim quen annual dueien las lavurs esser finidas e pagadas. Nus quintein cun cuosts sut 4'000'000.- frs. Duri Lutz fa la damonda daco che las controllas d'aua seigen uonn ton pli caras? Il president declara ch'el hagi stuiu far duront las lavurs vid il niev aquaduct 3 emprovas da quell'aua. Quei seigi stau necessari per garantir che l'aua vegni buca contaminada duront las lavurs da baghetg. Tut tschellas controllas ein era integradas en quels cuosts.

Plinavon damonda Duri sch'ils sclussaduirs ed il hydrant vegls vegnan buca allontanai?

Il president confirma ch'el miri aunc che tut ils indrez vegls che vegnan buca pli duvrai pli vegnan era dustai.

Duri ei era dil meini che las lavurs vid las lingias digl acuaduct seigen buca vengidas survegladas avunda.

Il president declara che la surveglanza dallas lavurs seigi delegada alla firma IPZ. Corsin Flepp giavischa il quen final sin l'entschatta october 2026 per che la vischnaunca sappi risguardar el proxim preventiv sia cumparsa da 10% dils cuosts finals. Il president pren quei giavisch per notizia.

## **5. Rapport dil president**

Sco mintg'onn dat il president in cuort rapport dil schabegiau duront igl onn vargau.

Il Provediment d'aua Medel/Lucmagn remplazza el rom da ses pensums la vischnaunca da Medel e representa sin quei sector ses dretgs e sias obligaziuns. Igl onn 2025 ei stau in onn cun dabia lavur.

Cun l'aua igl aquaduct dad Acla/Fuorns haiel stuiu far 3 emprovas da qualidad. Quei per la segirtad che l'aua vegni buca contaminada duront las lavurs da construcziun.

Las controllas d'aua fatgas digl uffeci han mussau a Mutschnengia ed Acla/Fuorns in pign disturbi. Quei probabel perquei che la persuna digl uffeci ha priu l'aua per las controllas gest suenter dis da dracca. Dus meins pli tard haiel aunc priu inaga aua per far las proximas emprovas. Quellas han lu mussau che noss'aua ei highienicamein da fetg buna qualidad e corrispunda allas pretensiuns conform alla lescha en tuts quater aquaducts. Il rapport da quellas emprovas ei publicaus sin nossa pagina d'internet.

## Aqueduct Acla/Fuorns

Leu ha ei entschiet la primavera cun in grond sforz per dumignar las firmas sin il plazal da lavur. L'entschatta matg havein saviu colligiar il vitg da Fuorns cun il niev aqueduct e la turbina ha entschiet a producir energia. Il cabel per reglar la prestaziun maximala dalla turbina ei vegnius colligiaus per il november. Igl aqueduct vegl dallas Caltschinas ei vegnius ord funcziun. La stiva da fontauna e las duas stivas da reduziun ein vegnidas allontanadas. Il reservuar ei emplenius cun tiara. Il plaunterren da quei baghetg survescha sco batteria per il system da func Policom dil cantun Grischun. La parcella ed il baghetg havein saviu vender alla polizia cantunala.

## Ruttadiras 2025 :

Entschatta zercladur havein giu ina ruttadira tier igl aqueduct da Mutschnengia sut Stagias. Il november ina ruttadira tier igl aqueduct da Platta a Pardé. Anflar la ruttadira ei savens ina sfida, havein denton anflau omisduas ruttadiras spert ed exact.

## Zonas da schurmetg S1

La seiv entuorn la zona da schurmetg S1 a Pazzola ha l'alp fatg.

## Controlla :

Igl uffeci per segirtad da victualias e per la sanadad d'animals ha era igl onn vargau fatg ina viseta e controllau igl aqueduct da Mutschnengia e Platta. Era ha el constatau enzatgei pintgas maclas e puspei criticau la turbina da l'alp Pazzola. Sco il gerau d'agricultura Lucas Venzin ha confirmau vegn la turbina distaccada sil pli tard questa stad da nies aqueduct. Sin quei spitgein gia daditg. Il controllader ha ludau la lavur dils survigilders.

A Platta ha el era fatg ina controlla d'arsen, la quala era en rama legala.

Ils survigiladers han retschert igl onn vargau lur ordinaturs cun ils documents conform alla segirtad da qualidad.

La surastonza ha tenui treis sedutas. Ina da quellas ensemen cun ils survigiladers d'aua.

Per conclusiun lessel aunc engraziar a mes consuprastons sco era al gerau Corsin per la buna collaboraziun. Era descha ei a mi d'engraziar als survigiladers d'aua per lur engaschi. Els fan fetg buna lavur. Engraziel fetg.

Per damondas tier il rapport dil president giavischa Duri Lutz il plaid e fa la damonda sche la turbina a Tegianova vegni remplazzada.

Na, quella vegn allontanada. Ina sanaziun vala buca la peina. Quella turbina sauda all'alp Pazzola e quella surpren era ils cuosts per dustar ella.

Plinavon menziunescha Duri ch'ei seigi buca vegniu segau uonn entuorn il reservuar a Plaun da Muschins.

Il president mira che quella lavur vegni fatga egl avegnir.

## **6. Program da lavur 2026**

Per igl onn 2026 spetga buca tonta lavur per il Provediment d'aua.

La sanaziun dallas vias a Curaglia vegn buca cuntinuada igl onn 2026.

Tier il niev aquaduct dad Acla/Fuorne eis ei aunc da finir entginas lavurs ed era enzatgei lavurs da garanzia.

La seiv entuorn la zona da schurmetg S1 a Tegianova surpren l'alp da clauder.

La zona S1 a Plimata stuein marcar da niev nua che la seiv sauda propi.

Werner Giger menziunescha che quella fontauna rutta si Pass Nausch fussi da tschaffar da niev puspei. Ussa ch'ei per uonn pauc program da lavur seigi quei da far.

Il president pren il plaid e declara che pinar quella fontauna seigi buca previu il mument ord plirs motivs. La fontauna principala si Pass Nausch furnescha dapli aua che quei che la lingia da transport meina a val. Pia flessegias quell'aua tuttina surora en la stiva d'aua. Igl aquaduct da Platta furnescha aua en abundanza igl entir onn ed dapli aua che tut quei che vegn duvrau flessegia surora el reservuar. Igl aquaduct da Platta ei era colligiaus cun quel da Curaglia ed en cass nunprovedi san quels furnir aua in da l'auter. Pinar quella fontauna ei ina lavur heiclia cumbinada cun dabia cuosts. Il Provediment d'aua Medel ha stuiu investir bia milliuns ils davos onns ed ei suonda vinavon investiziuns cun la sanaziun dallas vias a Curaglia. Ord quels motivs ha la suprastonza decidu da buca dar prioritad e pinar quella fontauna per il proxim temps.

Duri Lutz pren il plaid e di che quei di che la fontauna principala rumpi hagi Platta memia pauc aua. Tuts ils aquaducts dil provediment seigien ussa sanai. Mo quel da Platta vegni tralasciaus dalla suprastonza. Aschia vegn il Provediment d'aua Medel buca menaus correct.

Corsin Flepp pren il plaid e di che sche la suprastonza hagi priu quella decisiun sauda quei d'acceptar quella. Sche giavischeis in auter cuors dil Provediment d'aua stuein elegier in'otra suprastonza ed allura prender outras decisiun.

Sinquei suonda ina discussiun plein energia ed emoziuns.

La pussevkladad da scumiar il tgamun dalla suprastonza sedat enteifer questa radunanza tier la tractanda 8 elecziuns.

Sin la damonda per amplificaziuns ni damondas tier il program da lavur 2026 negin dils presents che fa menziun.

## 7. Fixar las taxas per 2026

La suprazion fa la proposta da schar las taxas d'aua vinavon sco igl onn vargau.

Classa d'object 1	130.00 frs.
Classa d'object 2	200.00 frs
Classa d'object 3	350.00 frs.
Classa d'object 4	
Per envarnonta:	12.00 frs.
Tegias da mises colligiadas:	100.00 frs.
Tegias da mises Surtatschas, buca colligiadas:	60.00 frs.
Tschalers da schurmetg vischnaunca:	35.00 frs.
Tualettas publicas:	65.00 frs.
Taxa sin aua da stizzar:	2‰ dil schazetg
Reducziun sin baselgias e capluttas	70%

Las taxas ein vegnidas actualisadas la davosa ga alla radunonza generala 2021

La proposta la schar las taxas vinavon sco menziunau cheusura vegn approbada unanimamein dils presents.

## 8. Elecziuns/ reelecziuns

Il president Alfons Venzin ha buca demissiunau sco president e stat a disposiziun per la reelecziun per ils proxims treis onns. Il president menziunescha denton ch'el surdat siu post sche zatgi giavischa quei. El dat il plaid agl actuar per l'elecziun.

Igl actuar engrazia al president per sia gronda lavur e ch'el stad a disposiziun per la proxima perioda d'uffeci

Otmar fa la damonda als presents per autras propostas per igl uffeci sco president. Demai che negin s'annunzia fa el la proposta d'eleger Alfons Venzin sco president per ils proxims treis onns. Alfons vegn elegius dils presents sco president dil Provediment d'aua.

Il cassier stat era a disposiziun per la reelecziun. Il president fa la damonda als presents per ulteriuras propostas. Perquei che negin s'annunzia fa el la damonda da reelegger Cedric Flepp sco cassier per ils proxims treis onns. Cedric vegn elegius dils presents. Il president engrazia a Cedric per sia buna lavur.

Vinavon vegn in revisur da quen elegius. Era cheu ha Martin Bearthi buca demissiunau e stat a disposiziun per la reelecziun. Autras propostas dat ei buca. Pia fa il president la damonda d'eleger Martin sco revisur da quen per ils proxims treis onns. Ils presents sustegnan quella proposta unanimamein. Il president engrazia era al Martin per siu engaschi.

## **9. Nominaziun da candidats per las elecziuns communalas**

Uonn vegn la suprastanza communal elegida. Cheu ein aunc dus posts sco gerau vacants. Il president fa la damonda als presents per eventualas nominaziuns da candidats enteifer nossas retschas. Sin quella damonda negin che giavischa il plaid.

## **10. Varia**

Il president dat il plaid als presents per far damondas sut varia. Negin dils presents che giavischa il plaid.

Il president envida tut ils presents da aunc da star in mument da cumpignia e guder in sitg suenter la radunonza.

Cun quei invit siara il president la 18avla radunonza generala, el engrazia a tuts presents per lur preschientscha e giavischa silsuenter a tuts in bien retuorn a casa.

Curaglia, ils 05-05-2026

Igl actuar :

Otmar Venzin